

28/10/1998

Tidak ada hasrat keluar FPDA

Eby Azly Abdullah; Zulkofli Jamaludin

KUALA LUMPUR, Selasa - Malaysia tidak bercadang menarik diri daripada Perjanjian Pertahanan Lima Negara (FPDA), walaupun tidak menyertai latihan ketenteraan FPDA baru-baru ini, kata Datuk Seri Dr Mahathir Mohamad.

Menurut Perdana Menteri, beliau tidak tahu menahu mengenai sebarang kajian semula pembabitan negara dalam FPDA dan sehingga kini Malaysia masih menganggotai FPDA.

"Kita tidak membuat sebarang keputusan lagi (mengenai keanggotaan dalam FPDA). Ia hanya spekulasi pihak tertentu saja," katanya menjawab pertanyaan pemberita mengenai status Malaysia dalam FPDA.

Terdahulu, Dr Mahathir merasmikan pameran Heli-Asia 98 di Pusat Pameran Antarabangsa Mines, dekat sini hari ini.

Bulan lalu, Malaysia menarik diri daripada Latihan Ketenteraan Star (Stardex) di bawah FPDA, latihan maritim dan udara besar-besaran yang berlangsung sejak bulan lalu. FPDA disertai Britain, Malaysia, Singapura, New Zealand dan Australia.

Penarikan diri itu menyebabkan Penolong Setiausaha Negara Amerika bagi Hal Ehuwal Asia Timur dan Pasifik, Stanley Roth, dilaporkan memberitahu sebuah forum di Singapura tiga hari lalu, negaranya menganggap tindakan Malaysia menarik diri daripada latihan FPDA itu sebagai perkembangan negatif.

Roth juga melihat tindakan Malaysia itu sebagai reaksi kepada perselisihan dengan Singapura dan bukan atas dasar ekonomi seperti dijelaskan oleh Menteri Pertahanan, Datuk Seri Syed Hamid Albar.

Mengenai kenyataan Singapura bahawa dakwaan Malaysia berhubung pencerobohan pesawatnya ke ruang udara negara sebagai tidak benar, Perdana Menteri berkata ia akan disiasat.

"Kita akan kaji dan tengok sama ada (dakwaan itu) benar atau tidak," katanya.

Dibentuk ketika kemuncak Perang Dingin, FPDA yang berusia 27 tahun itu bertujuan melindungi Malaysia dan Singapura daripada ancaman komunis melalui peraturan ketenteraan yang longgar antara kedua-dua negara berjiran itu dengan Australia, New Zealand dan United Kingdom.

Di samping siri latihan ketenteraan bersama, tentera udara Malaysia dan Singapura juga dihubungkan dengan Sistem Pertahanan Udara Bersepadu (IADS) yang ditubuhkan di bawah naungan FPDA.

(END)